

同學仔你哋好！係咪好想快啲開始設計你心目中嘅海報呢？老師會喺呢堂簡單講解一下 Adobe Illustrator 嘅用法，等你哋可以盡情發揮創意小宇宙！

Adobe Illustrator，簡稱 Ai，係一個平面設計軟件。佢嘅功能非常齊全同豐富，連專業嘅設計師都係用佢㗎！有經驗嘅同學仔可能都知道 Ai 係一個向量圖（vector）軟件，意思即係透過建立同操控呢啲路徑嚟製作出心目中理想嘅圖案，而呢啲圖案，係可以隨便放大縮細都唔會起格㗎！

大家係咪已經喺電腦面前，開咗 Ai 出嚟，ready 好晒呢？咁我哋就進入第一個環節——「正確格式有辦法」！

揸「檔案」→「新增」→「列印」→「檢視所有預設集」，應該就會見到「A3」畀你揀，亦即係今次海報大賽嘅基本格式要求。

一齊嚟檢查一次右手邊嘅數值：寬度係「297mm」，高度係「420mm」，方面打直，色彩模式係「CMYK 色彩」，點陣特效係「高（300 ppi）。如果低過 300，打印出嚟嘅圖畫就好容易會朦查查㗎啦！

除咗開一張正確格式嘅畫紙，輸出一個格式正確嘅檔案都係好重要㗎！所以我哋跳一跳步，假設我已經完成創作呢張海報，可以輸出然後提交畀大會喇。揸「檔案」→「轉存」→「轉存為…」，就會彈出一個視窗畀你幫個海報改名，同埋揀一個合適嘅儲存位置。喺格式呢行，揀「JPEG」或者「PNG」，然後一定一定要點選「使用工作區域」呢一項，如果唔係輸出嚟嘅圖畫就唔係 A3 格式㗎啦！

既然清楚晒大會嘅格式要求，咁我哋就立即去下一個環節——「圖案操作三部曲」。

左手邊打直呢一行叫做「工具列」。「矩形」、「橢圓形」、「多邊形」、「星形工具」都係可以用嚟畫一啲幾何圖形嘅。用「矩形」同「橢圓形工具」嘅時候，如果同時揸住「Shift」制，就可以拉到正方形同圓形出嚟㗎喇！

如果想畫一啲複雜嘅圖案，就可以利用工具列上嘅「鋼筆工具」嚟畫一啲直線，或者係由直線組成嘅形狀。「曲線工具」有異曲同工之妙，只係畫出嚟嘅線條會自動變成曲線。

有經驗嘅同學仔可能已經知道，其實「鋼筆工具」都係可以畫到曲線㗎！喺每揸一粒新嘅點嘅時候，唔好咁快放手，向外一拉，就可以將畫緊嘅硬掘掘嘅直線變成柔軟嘅曲線。如果同時揸埋「Alt」制，就可以做到曲得嚟又係銳角嘅效果喇！

每一個圖形，都係可以透過右手邊嘅「內容」設定佢嘅顏色、線條顏色、透明度、線條粗度，甚至可以將線條變成虛線添。點選多過一個圖形嘅話，就可以喺呢度將佢哋對齊。

喺樓上揸「視窗」→「路徑管理員」，就會彈出一個小視窗。呢度會搵到四種「形狀模式」，都係非常有用，佢係分別係：將兩個點選咗嘅形狀竊埋變成一個、將其中一個食咗另外一個、剩係留返圖形交疊嘅部分、剩係留返圖形唔係交疊嘅部分。

要更改已經起好咗嘅圖案，可以用呢個「直接選取工具」去改變啲點點嘅排位。而上面嘅「選取工具」就係用嚟移動、旋轉同放大縮小啲圖案。

喺大會嘅官方網站上面，可以下載到一系列嘅「健康雙俠」卡通角色。只要載入到畫紙上就可以將一眾角色融入你嘅海報設計入面啦！

學識咗製作唔同種類嘅圖案，然後就要整理好佢哋——「善用圖層與群組，物件再多都不凌亂」。

喺右手邊嘅「圖層」入面，可以安排邊啲物件放前啲，邊啲物件放後啲。除咗圖案，你可能仲會有文字、下載落嚟嘅健康雙俠角色等等。當有畫面有太多物件、搞到你眼花撩亂嘅時候，可以點選同一系列嘅嘢，然後揸右鍵→「結合成群組」。咁就可以將啲圖層分門別類咁整理好喇。

好！今日就教住咁多先，係咪已經蠢蠢欲動想快啲一試身手呢？記得海報設計大賽嘅截止日期係 2021 年嘅 6 月 30 日呀！